

G E R M A N I A V E T V S .

Nos accessisse negamus, sed mansisse. Quippe Plinius jam inde Germaniæ limitem ad Scaldim fluvium protendit. Idemque simul & Tacitus ab usque Sequanis omnem Rheni ripam citeriorem Germanos accoluisse tradit. Apud Cæsarem ipsi Rhemi, Belgica natio, ultro testati sunt, Belgas plerosque esse ortos à Germanis. Tacitus Æstios, qui olim totam Livoniam & Prussiam occupabant, diserte Germaniæ attribuit. Plinius Norvagian, Suediam ac Finnos, & quicquid terrarum Oceano Septentrionali, Moscoviæque confiniis ambitur, Germaniæ tribuunt. Quin etiam Peucini, alio nomine Bastarnæ dicti, à Vistulæ fontibus olim ad Pontum usque Euxinum & Istri ostia extensi, Germani fuere.

Vetustissimi igitur Germaniæ termini fuere, ab Occasu Rhenus amnis, & Oceanus Germanicus: à Septentrione Oceanus Hyperboreus, ab Ortu Granvicus & Finnicus sinus, mare Suevicum, sive sinus Codanus, Vistula amnis, & à fonte ejus linea ad Sarmaticos montes ducta, dein à Meridie ipsum Danubii flumen. Postea vero portiones ei ad lavam Rheni ripam ex Gallia, & ex Sarmatia ad sinum Codanum & dextram Vistulæ ripam, & ultra Danubium etiam accesserunt. Longitudo ejus summa fuit à Scritofinnia promontorio, vulgo *Noortkyn*, ad Danubium usque, mill. Germ. 400. Latitudo vero maxima à Rheno amne juxta Basileam, ad Amadocam usque paludem, quæ in confiniis Russiæ, Lituaniæ ac Podoliæ sita est, mill. Germ. 200.

Celebriores Germaniæ fluvii, idemque navigiorum capaces sunt, Oceanum petentes, *Rhenus*, qui lacum Brigantinum, vulgo *der Bodensee*, transiens, recipit Nicrum, Mœnum, Luppiamque. Hinc *Amisus* sive Amisia. Mox *Visurgis*. Inde *Albis*, qui Salam secum devehit. In sinum Codanum sese effundunt *Chalusus* sive Trava: *Viadrus*, antea Suevus, nunc Odera, *Vistula die Weixel*. At Danubius vulgo *de Donau*, omnium Europæ maximus à dextra ripa ex Vindelicia Lichum, vulgo *der Lech* & Ænum, vulgo *der In*, à lava Navam, vulgo *die Nabe*, & Marum, *die March* in Pontum Euxinum defert.

Silvarum Romanis monumentis celebratae sunt: Hercynia, totam fere olim Germaniam occupans: proprie tamen sic circum Bohæmiam appellata; vulgo nunc *der Bohaymer Wald*. Bacenis, quæ & Semana, vulgo nunc in Brunsvicensi Ducatu *der Hartz*, antiquam Hercyniæ memoriam servans. Gabreta, vulgo *der Doringerwald*. Luna inter Moraviam, Poloniam, & Hungariam. Martiana, seu fortè rectius Hartiana, nunc *der Schwartzwaldt*. Cæsia, ad dextram Luppiæ amnis ripam, haud procul Vesalia.

Montium nobilissimus Hercynium jugum *Montes* Bohæmiam cingens, qui & Suditi montes. Dein Abnoba in Ducatu Wirtenbergenfi circa Danubii Nicrique fontes. Taurus ex adverso Monguntiæ, vulgo *der Hayrich*. Rhatius ex adverso Bonnæ, *das Siebengebirge*. Melibocus in Brunsvicensi Ducatu, apud Semanam silvam, vulgo *der Blocke-Barch*.

